

BARTIMEU



LECTIO BA PREADOLEXENTE / ADOLEXENTE

INTRODUSAUN

Tinan ida ne'e personajen ruma Biblia nian sei sadik ita atu kompara ita-nia fiar ho sira nian. Liuhusi Lectio Divina, ita sei halo Maromak nia Futar Lia ko'alia ba ita-nia moris.

Molok hahú, ita sei husu **Espíritu Santo** nia tulun atu bele lee no komprende pasajen ida ne'e tuir Maromak nia hanoin. (bele hili knananuk ida ka orasaun ida)



LECTIO

Ita koko atu hakle'an ema ne'e nia esperiênsia oinsá, nia dehan saida ka halo saida; atu komprende ambiente iha ne'ebé nia moris. Ita sei fó pergunta ba testu sira hodi hanoin mós ba testu seluk husi Testamentu Tuan ka Foun.

Sira to'o Jeriku

Sira ne'e se? Sira mai husi ne'ebé? Jeriku iha ne'ebé?

Jezús no eskolante sira mai husi Galileia no sei la'o daudaun atu ba Jerusalein, iha ne'ebé Jezús sei hetan terus. Jeriku mak sidade antiga liu ne'ebé iha rai fuik maran, maibé besik sidade iha bee matan ruma, nune'e iha sidade buat hotu sei matak no ida ne'e mak baliza molok sai husi Jeriku, ba Jerusalein.

Wainhira Jezús atu sai ona husi Jeriko ho Nia eskolante sira ho ema lubun boot, ema matan delek ida, Bartimeu, Timeu nia oan, tur iha dalan ninin, husu esmola.

Tansá Evanjellu temi ema ida ne'e nia naran?

Los duni, bainbain evangelista la temi ema kiak sira maibe temi dei't sira ne'ebé simu milagre nia naran, no mós diabu sira ne'ebe temi Jezús nia naran; maibé matan delek ne'e iha naran no bolu Jezús ho ninia naran. Ida ne'e mak milagre ikus nian ne'ebé ita hetan iha evanjellu Marcos nian, no parece katak sasin ida (Pedro karik?) haktuir istória ida ne'e ba Marcos. Ema ida ne'e mak matan delek, maibé nia "haree" Jezús ne'ebé liu!

Uluk ema matan delek no kiak moris oinsá?

Ema nune'e depende de'it husi ema nia laran luak, nia moris loron -loron nian konforme buat ne'ebé nia hetan. Nia moris "sosiál" laiha folin, liuliu la iha "dignidade" ne'ebé ema bainbain iha. Hebreu sira considera ema aleizadu ka moras nu'udar ema sala na'in ne'ebé simu kastigu husi Maromak.

Wainhira nia rona katak Jezús Nazare liu husi ne'ebá, nia hahú hakilar hodi dehan: "Jezús, David nia Oan, sadia ha'u!"

Tansá nia bolu Jezús ho título ida ne'e? tansa nia hakilar maka'as? Katak sa: "sadia ha'u"?

David nia oan mak título Messias nian; iha ninia evanjellu, Marcos koko atu hatán ba pergunta: "Jezús se loos?" no istória ida ne'e masu bainhira evanjellu besik ona atu to'o Jezús nia terus.

Bartimeu hakilar maka'as tanba nia iha hakaran boot ida atu bele hasoru Jezús, bele dehan katak nia hakilar tanba laiha esperansa ba futuru, maibé mós tanba nia iha konfiansa boot iha Jezús. Nia husu atu Jezús "sadia" nia, nia la husu atu haree fali; buat ne'ebé nia husu mak kle'an liu.

Ema barak si'ak nia hodi haruka nia atu nonok, maibé nia hakilar maka'as liután: "David nia Oan, sadia ha'u!"

Se mak si'ak Bartimeu no tansa?

Evanjellu la dehan sira ne'e se los, karik ema ne'ebé tuir Jezús no la kahi halo nia sai kole... maibé hodi halo nune'e sira hatudu katak sira ladún komprende Jezús nia hanoin.

Jezús hamriik hodi haruka atu lori nia mai.

Molok momento ida ne'e, Jezús la haree Bartimeu? Saida mak halo Jezús para?

Karik Jezús la haree duni nia tanba iha ema Barak, ka karik fofoun Nia la kahi halo milagre ida tan. Maibé tanba Bartimeu insiste no hakilar, Jezús, ho autoridade, bolu nia hodi hatudu ninia intensaun atu hatán ba Bartimeu.



Ne'e duni sira bolu ema matan delek ne'e: "Aten berani. Hamriik ba. Nia bolu ó."

Tansa Jezús konvida nia atu hamriik?

Liafuan grega ne'ebé Jezús uza atu dehan "hamriik" mak hanesan liafuan ne'ebé evangelista sira uza atu dehan katak Jezús moris hi'as. Nune'e, Jezús hakarak bolu Bartimeu ba moris foun ida.

Nia soe tiha nia kapa, hamriik kedas hodi la'o lalais ba Jezús.

Tansa Marcos hakerek kona-ba kapa?

Marcos temi partikulár ida ne'e, tanba karik ida ne'ebé haktuir ba nia fô importánsai ba aspetu ida ne'e; maibé mós, hodi haree movimentu 3 ne'ebé matan delek ne'e halo, ita komprende saida mak nia sente no ninia hakaran. Kapa iha ne'e representa ninia moris uluk nian ne'ebé oras ne'e nia pruntu atu husik.

Jezús lia tun ba nia dehan: "Ó hakarak Ha'u sei halo sa loos ba ó?"

Tansa Jezús husu hanesan ne'e? ba Nia mak importante buat ne'ebé Bartimeu hein?

Ho liafuan hirak ne'e Jezús hatudu ninia disponibilidade, hanesan Nia dehan: "Ha'u iha ne'e ba ó". iha momento ne'e Nia la iha interese seluk se lae Bartimeu.

Ha'u-nia Mestre, halo ha'u haree!

Tansa oras ne'e Bartimeu ko'alia ba Jezús hanesan ba belun ida? Se nia hetan isin di'ak, saida mak troka iha ninia moris?

Bartimeu ko'alia nune'e tanba nia sente katak Jezús pruntu ba nia de'it. Nia hatene katak hodi hetan isin di'ak, nia tenke ba serbisu, la bele ona husu esmola, maibé nia tenke foti ninia responsabilidade sira.

Jezús dehan: "Ba, ó-nia fiar soi ó!" Nia matan nakloke kedas no nia la'o hamutuk ho Jezús iha dalan."

Tansa Jezús ko'alia kona-ba maksoin no fiar? Jezús presiza fô isin di'ak ba ema ida ne'e?

Jezús konvida ema matan delek atu la'ó; ema ne'ebé moras moris iha situasaun "travada"; ema hotu la'ó, nia metin iha fatin. Jezús mai atu halo nia book an, liberta nia, kore ninia "korente". Fiar soi ema ida ne'e, tanba nia buka enkontru ho Jezús: ida ne'e halo nia hetan maksoin iha aspetu espiritual, maibé mós hodi haree fali, bele dehan katak nia hatene dalan iha ne'ebé no hatene Lia loos.

MEDITATIO

Ita koko atu haree fila fali
testu ida ne'e, hodi
komprende nia dehan
saida ba ha'u-nia moris no
Kreda ninian. (ponto
ruma) ne'e hakarak fo
sujestaun atu ida-idak bele
deskobre saida mak
Maromak dehan ba nia
liuhusi pasajen ida ne'e.

- Ita la'ós matan delek iha isin, maibé dala ruma ita-nia matan fiar nian mak delek: ita la haree saida mak mosu besik ita, ita la kahi haree ema nia presiza no Maromak nia prezensa iha mundo ida ne'e. Maibé furak tebes bainhira ita hatene rekoñese Maromak ne'ebé "liu" iha ita-nia moris, ne'ebé hateke ba ita no konvida ita atu hamriik, atu la sadere ba ema seluk maibé hatudu ita-nia fiar.
- Bainhira ita hadomi ka gusta kolega ida, ita buka de'it atu hasoru nia, atu ko'alia ba nia; se nia liu karik, ita hamriik kedas atu tuir nia, ita la moe atu hatudu hahalok bulak nian... maizumenu hahalok sira ne'e hanesan hahalok ne'ebé Bartimeu hatudu: bainhira ita hadomi ka gusta buat ruma ita pruntu atu halai de'it... hanesan ne'e mós ho Jezús?
- Atu bele iha relasaun kle'an ho jezús, ita presiza sente Nia nu'udar belun, nu'udar Ida ne'ebé fô tempu tomak ba ita nia nesesidade, to'o bainhira Nia hanesan estrangeiru ida ne'ebé liu, ha'u sei hametin ha'u-nia relasaun ho Nia.
- Hasoru Jezús iha sakramentu sira (liuliu Rekonsiliasaun no Eukaristia) troka buat ruma iha ita-nia moris? Ha'u hatene husik buat ne'ebé uluk nian no hili Jezús nafatin?

ORASAUN

Ha'u koko atu espresa buat ne'ebé ha'u deskobre ohin kona-ba Jezús liuhusi invokasaun badak (hanesan ida ne'ebé Bartimeu uza) ne'ebé ita bele repete no sei akompaña ita iha buat hotu ne'ebé ita halo.

ATIVIDADE

Fô atensaun ba momento sira ne'ebé, iha ó-nia moris, ó sai matan delek hodi la haree ema seluk nia presiza; bainhira ó konxiente katak ó la kahi haree buat ruma, harohan ba Maromak atu Nia bele tulun ó hodi manan ó-nia sentimentu hirak ne'e.

